

國史書

清代傳記叢書



明文書局印行

清代傳記叢刊・綜錄類③
周駿富輯

碑

傳

集

(五)

卷六九至
卷八六

(清)

錢儀吉纂錄



明文書局印行

碑傳集卷六十九目錄

雍正朝督撫

少保楊清端公宗仁墓誌銘

楊椿

又楊宗仁傳

八旗通志

廣東巡撫楊公文乾墓表

牛運震

尚書唐公執王墓誌銘

楊春

直隸總督兵部尚書李敏達公衛傳

袁枚

左都御史裴公率度家傳

鄭虎文

又左都御史裴君事略

彭啟豐

詹事府詹事加侍郎銜刑部右侍郎黃公叔琳墓誌銘

陳兆嵩

又黃崑圃先生傳

戈濤


奉天府尹商邱宋公筠墓誌銘

沈德潛

光祿寺少卿楊公祕墓誌銘

袁枚

WA 423/04



110-004

碑傳集卷六十九

嘉興錢儀吉纂錄

雍正朝督撫

少保楊清端公宗仁墓誌銘

楊椿

光祿大夫太子少傅總督湖廣軍務兼理糧餉兵部右侍郎兼都察院
右副都御史楊公諱宗仁字天爵其先山東沂水縣人徙遼東世爲遼
陽名族

國初隸鑲白旗佐領下

今上改入正白旗遂爲正白旗人也公少沈深有智量於世俗聲勢利
欲不一動其心慎交游寡言笑嘗與人言志曰士當審其所當爲嚴其
所不可爲而已或勸之仕曰吾斯未信雖聖賢不能必吾敢苟哉康熙
三十五年秋奉父命始出爲湖廣慈利縣知縣調藍山陞陝西階州知
州遷同知臨洮府事監牧蘭州轉知臨洮府事分巡西甯道陝西按察
使司副使浙江按察使司按察使丁父憂服闋補廣西按察使署理廣
西巡撫未幾授廣東巡撫六十一年冬

今上登極陞湖廣總督既至奏紬大吏之尤溺職者數人罷鹽規一十

六萬以其利與民及商屏屬員餽遺革重耗令官吏計口授費不得妄有侵漁累民濱江州縣舊設征商口岸一百五十皆徹除之禁荆關額外之稅於行旅者議湖南北分闡取土之制與數歲甲辰江水驟漲捍禦有方築隄幾千百丈其冬設廠以賑貧民民以不饑凡公所爲必求其利病所在與俗所宜其利於已者未嘗肯爲之其利於民及行之或有弊者興革之惟恐不速嘗待旦而興過夜分而寢而公亦積勞而成疾矣雍正元年夏

上遣御醫來視又命公之子榆林道副使文乾爲按察使侍養明年公疾稍瘳起文乾爲河南布政使尋命巡撫廣東三年夏加公太子太傅上方珍物中秘之書歲時賞賚不絕公益祇勤不敢以疾爲解其秋七月公疾大作十八日癸丑公薨享年六十有五訃聞天子震悼贈公少保世襲拜他拉布勒哈番十二月權將至京遣大臣郊迎奠酒比至命殯於城南里第遣親王奠茶者再諭祭二壇賜公諡曰清端越三年文乾自廣東給假歸治公之葬復加祭一壇時雍正五年五月乙酉晦也公之令慈利也縣在萬山中與苗接壤苗虐其下制炮烙諸刑苗人畏之走匿公縣界長以賄求之不得上官聞檄召公

公曰苗吾赤子也窮來歸我以賄反之如民父母何上官直公言乃止入排梗化提督林某帥師討之道出藍山林不恤其下眾咸怨登山將爲變公單騎往諭眾感悟喜曰聞公言我等不敢有異志向公羅拜曰楊公活我楊公活我其在階州州古武都郡生羌時出爲民害前知州患之不能制公連堡寨謹斥堠召其酋豪明諭之酋豪震懾不敢肆康熙五十九年春文乾以東昌府知府奉命西行道經階蘭臨洮西甯之地皆公舊所治父老詢知公子感慕追思有牽衣不忍令去者公善決獄在湖南常甯縣民有被仇殺者令疑其爲盜寘十二人於大辟仁皇帝矜之詔所司重讞巡撫趙恭毅公以屬公公訊得其仇二人十人者皆免在浙江以明允見稱爲公平反者尤多也公素廉不妄取予其撫廣東也廣故多盜地富饒海外之貨日至公帥下以清州郡修整訖公去廣百姓幾莫有爲盜者公先實後名與人交未嘗以私干之人亦莫能干也性寬平不爲劓絕谿刻之行爲督撫所屬僚吏數千人公盡識其賢不肖能否所薦引必當其人有不職先誨之其不改從而糾斥之或見公時有戚容以詢公公曰吾適有所糾爾其人曰公所糾必當奚戚爲公曰吾爲大臣不能令官屬爲循卓致名列彈章吾甯能不

戚平公才識明敏臨事善斷所至未嘗有廢務然不以行能驕人趙恭毅公尤重之嘗指公謂人曰楊君奇才也不久將任吾位矣世以此稱恭毅知人而服公爲不可及曾祖諱繼盛祖諱必登舉順治乙酉順天鄉試父諱朝正事

世祖章皇帝爲侍衛

聖祖仁皇帝時改兵部督捕司員外郎歷山東東昌府知府治有能聲曾祖妣某氏祖妣某氏妣段氏公之未至湖廣也段太夫人卒於公弟河南巡撫宗義之官舍公在道星奔

上令宗義葬母歸而命公在任守制公時年六十有三矣哀慕哭泣如孺子其年又四月

上念公勞勩賜祭公父母贈公三世如其官妣皆一品夫人公孝謹四時之祭雖老未嘗屬之子孫卒之前三日中元祀先公時疾已革左右咸請公毋拜公不可仍跪拜如禮公舉止端方燕處未嘗有惰容雖盛暑不袒裼自奉淡泊布袍蔬食宴如也娶陳氏贈一品夫人子男一人文乾女一人適候選縣丞崔惟岐孫男二人應瑤候選府同知應琚一品廕生孫女一人適雍正癸卯舉人申澍曾孫男一人曾孫女一人俱

幼初公與母弟宗義同時開府宗義歸文乾繼公撫廣與公接壤縉紳以爲榮公事

聖祖勤勞三十年

今上時尤以潔已奉公深知大義爲

上所優獎迨公歿而

上褒諭曰孤介端方始終一節蓋公清廉勤慎或從來諸臣所能而其不事黨援則非他人之所易及也其僅與公同時得並獎者今浙閩總督高公其倬川陝總督岳公鍾琪等六七十人方皆列於有位而公獨不幸早逝

上所爲追念良臣深爲愴惻愈久不能自已者也公

諭塋在宛平縣某鄉某里之原將葬文乾來請隧道之文椿與公同姓世通交好深悉公行事因爲撰次復繫以銘銘曰

人臣之義正直爲先其或不然偏黨植焉惟我楊公不偏不黨

帝特寵公百僚絕等公考公祖逮公之曾崇封四代峻爵尊榮匪惟爵之又祀秩之遷豆靜嘉于公設之祖考榮矣令子嗣節楚越連疆左旄右鉞駢蕃錫賚惟其沃矣生死榮哀曷其及矣匪公之榮正直是與孤

介端方

天子所予西山之原渾河之濱有歸者墳納七銘文

又楊宗仁傳

入旗通志

楊宗仁字天爵漢軍正白旗人贈光祿大夫楊朝正長子也生而穎異幼時舉止若成人比長隨父讀書留心吏治性至孝非奉親命未嘗離子舍康熙三十五年父使之仕乃謁選得楚慈利知縣慈利邑於叢山密邇苗夷民頑地瘠官廨在榛莽中宗仁曰是可行吾志矣地瘠上無苛求民頑可施教化爰勸農桑興學校民知力田孝弟向風喁喁有爭訟者牒投入卽召至庭片言立折民咸愛戴稱神君焉閱五年調衡州藍山縣藍山爲楚粵苗漢接壤邑稱難治會八排梗化楚帥率師援剿道由臨武臨武官吏懼擾賄帥取道藍山迂迴險阻士卒有怨言而帥素驚悍失眾心比師入境宗仁備牛酒郊勞見其將虐兵驕竊恐有變預爲備詰朝果大譟控弦豎幟踞山而囂宗仁單騎往諭以利害眾心稍釋曰公言良是但鼓譟有罪難束手就死能令本帥給文爲據則惟公命宗仁知眾疑難釋也曰是在我詣帥語以故立書不鼓譟文牒鈐以印付首事四人遂各歸伍事定宗仁諭兵眾曰印文固足據恐自操

左券異時究詰罪有歸眾爽然曰復何以解宗仁曰繳文卽無患眾俛首聽命倉猝閒大驚立弭宗仁力也鄰邑盜劫殺人鍛煉成獄十餘人定大辟

聖祖仁皇帝命覆讞撫臣以牘屬宗仁閱未竟得其情讐殺非盜殺也渠魁二人服辜餘盡釋其明允類如此三年計典巡撫趙申喬薦舉卓異擢階州知州階地生羌出沒白晝挾篋行旅病之宗仁至連堡寨謹斥埃豪羌斂跡未幾遷臨洮府同知監蘭州權稅值歲歉流離載道請發倉廩以賑饑黎寬歲額以通商賈招流亡以實戶口大吏知其賢悉從所請州多盜惟老瓜賊尤桀黠難治宗仁嘗奉檄覆讞他獄鉤距摘伏旁發老瓜賊至百餘案曰此雍梁閒大患也不治民害益熾窮治之則有司罹諱盜之譴乃取百餘事實弗爲十案悉寘諸法由是盜風寢息有司亦獲善全最聞旋擢本府知府率屬安民治績尤著尋擢西甯道西甯爲西陲要衝宗仁振積剔弊賢聲遠播公卿交章薦遷浙江按察使下車墨吏聞風避去豪右大猾屏息不敢喘明刑弼教兩浙無冤民會父卒於署宗仁扶輿行百姓攀留者填塞街巷服闋補廣西按察使未至旋奉

命署理巡撫抵任五日即特授廣東巡撫在任五載潔已率屬政令所
加風行草偃粵爲盜藪至是望風屏跡四境以甯雍正元年
特授湖廣總督是時宗仁弟宗義爲河南巡撫母就養河南以疾終宗
仁方赴楚旅次聞母喪牒知當事策騎奔赴偕弟治喪比奉
旨在任守制宗仁始奉

命至湖廣首劾大員發贓數十萬屬吏戰慄乃從容化導之禁餽遺減
耗羨革嵯商陋規除無名權稅興利除弊法在必行築隄禦水患散賑
救荒夙夜籌畫無一刻少懈久之疾作

上聞遣醫馳驛治療病間猶強起視事又以宗仁勤勞夙著正直不阿
晉秩太子少傅三年七月十八日卒遺疏入

特降勅旨褒諭言楊宗仁敬慎持躬廉能供職効力年久懋著勤勞簡
任總督以來潔已奉公孤介端方始終一節忽聞溘逝朕追念良臣深
爲悽惻難釋於懷應沛特恩以示優眷加贈少保並給拜他喇布勒哈
番與其長孫重穀承襲准襲二次尋部議卹典奉

旨賜諡清端給全祭葬建碑於墓文曰國家分職宣猷特重保釐之寄
飾終養舊用嘉篤棐之忱其有才守兼優靖共素勵荷絲綸之褒寵宜

琬琰之垂光爾楊宗仁操履方嚴服官勤恪播循聲於州縣旋綰郡符紀治行於監司俄遷觀察受殊知於

聖祖俾鎮撫於粵東譽望久彰廉能夙著朕念荆襄之要地特畀節制之重權亮節清風樹表坊於僚屬振綱飭紀能綏靖於軍民爰晉宮傅之階方懋旬宣之績良臣忽逝軫念難忘賜世爵以延恩命親王而致奠孤卿優贈祭醴加頒曰清曰端用旌懿行於戲名留竹帛邇品槩以如存榮被松楸緬賢勞而增感風於有位視此豐碑

廣東巡撫楊公文乾墓表

牛運震

世宗憲皇帝御極之初年乾綱英斷勵精剔釐中外風飛雷厲管攝震動八極督撫大吏恪清公慎厥職時則有若雲貴總督鄂公爾泰直隸總督李公衛廣東巡撫楊公文乾山西巡撫諾公敏甘肅巡撫許公容皆以剛正率屬下決壅鋤奸毋避豪貴嫌忌而廣撫楊公尤爲持寬嚴

中

天子倚爲股肱重審然稱一代名臣公字元統號霖宰先世遼陽州人國朝初籍京師曾祖必登順治某科舉人祖朝正東昌府知府均誥贈光祿大夫父宗仁歷官湖廣總督贈太保諡清端公爲清端公長子生

有異徵幼穎敏讀書觀大意才氣踔厲風發嘗從清端公官慈利藍山
階蘭洮湟每建一議清端公輒倚決父子閒自爲知己又以暇悉心經
國之務凡山川形勢阨塞渠防丈仞方程風俗謠服物產錢穀句稽盈
縮刑法讞報權比兵權軌伍械陣靡不析求機要精微以究實用初由
永定河官知曹州康熙五十七年擢東昌府知府特授陝西榆林道按
察司副使

世宗卽位加銜按察使旋遷河南布政使特授甘肅巡撫未赴調廣東
巡撫晉階都察院右副都御史治漕精明果決折獄如神一婦訴其夫
爲人殺公視其白屨也曰若夫死若預知之乎婦言今旦乃知之公曰
然則若何以辨白屨之前也因具詰之則與人姦殺其夫者也真諸法
五人者宿一室一人亡金訟其四人公悉坐之於庭而直視大聲曰吾
已得盜金者不盜者聽去一人色動欲逃執之果盜金者眾亦不知其
何從得也一女子爲人縊殺莫知主名公立走驗而盡召鄉少年謂之
曰屍帶般也吾將徵帶已而曰吾未食吾且食遂陽爲退食者而陰遣
役廉市帶者捕以來果得高二蓋拉姦女子不遂而以帶般之而公逆
知其市帶以驗也一訊卽服視其殺人之帶猶存焉公論殺二而請旌

女子一州大驚服當是時曹人袁進僞稱朱六太子挾妖術煽動山左朝廷命少宰勒公什布湯公右曾巡撫李公樹德督捕甚急檄帖如雨下公悉秘無聲陰遣幹役百十輩分道踪跡之而進不知以爲曹無捕之者果夜歸歸則公役掩而擒之膠而檻諸京師山東遂無事治東昌整綱綜目刃斷縷解所領三州十五縣無遺利害其除黎棗稅增築郡城外運河堤功尤最著云在榆林歲早流殍充道路公一日馳三四百里白制府請萬金爲民買穀未發公先出金廩軍民三月糧榆人卒以大濟榆林多沙少水不宜穀芻粟仰給內地公馳出長城求蒙古鄂爾多斯水泉地與旃裘毳帳之長結約通關俾民租種或以邊民種蒙古地非令甲閒公公曰監司職利民耳民享其利我任其咎不亦可乎當是時民得俵牛種市鑄鉏鋤躍事隴塍而公又爲民步香禱雨雨連大需歲收倍公私困匱充溢萬人歌謳軒舞邊氣大蘇在河南奏勘祥符封邱中牟陽武之瀕河沙壅地而除其歲額之入又河南倅貳以下例不得分耗羨爲廉費公言於田中丞悉一體分給他所以爲民人與便利者如在東昌榆林時及去豫吏民攀轅哭送者萬人初公在榆林而清端公總制湖廣會寢疾公請致官終養

世宗子按察使銜命侍養清端公疾愈公兩以事入謝

世宗問兩湖四鎮營制及設鎮本末公於

御前畫陳襄辰彝永形勢道里險易要害營汛疏密單複鈐轉并落米聚碁置

世宗獎歎久之曰此總督才也而公在東昌嘗以大臣子自請督運西陲輓糧萬石自西甯至通天河先期抵軍營出諸運第一

世宗固已奇公才及是遂起官豫藩而旋有廣東巡撫之命廣東爲清端公撫洩地公到任治兵綏民一如清端公要東嘗言大臣以識量爲才以屬吏爲功過又言刑辟成於督撫苟奏當雖秋官不能奪不愼則往往枉人命又嘗上奏云國家以人材爲主大臣以進賢爲先蓄材之道在豫教導善器使以故公薦舉劾奏公嚴無所瞻避屬吏輪寫心腹咸爲盡力所薦士或起家爲公卿方面大吏尉接下吏和顏咨詢凡有利弊必盡其同異可否興革功善推歸於下曰某道某府州縣所爲遇獄獄上小大躬推勘決疑亭法至於十反其愼如治獄有司之畏大吏者初到粵會歲視省城民少食公檄四方舟米俵糴貧不能者官爲償直全活無算水浸東莞博羅五邑公立請蠲賑又割廉俸千金爲錢米